





SALAI ON MAI

Thlangphyn boih lawngah ming khy syn a kung benah ming khy syn nokna a tai u boih. Thlangbawkw phynthli tawngpa ming a kung benah “Mr” hutaa ming tah “Miss” tila a tai u. Kawl phyn lawng “Anti” nokna a tai u tih Karen phyn lawng “Caw” tila a tai u. Tetih van angla Chin phyn lawng tawngpa ming khy a kung benah “Salai” hutaa ming khy tah “Mai” tila U **Tinmawng Oo** lawng a syn tih tihin to tai la awm. Chin Matuthli lawng zului vasak poi veng kah zaaksakna cahawn dawng thlangbawkw phynthli kah ming khy syn nokna “Mr on Miss” he tai la awm tih pia laikoi capat cahawn bawm dawng “Mr on Miss” he thut la awm bal. Tetih la thutnathli te zah ham la awm tih, Kai he thlangbawkw phyn aw, nawh tah Chin Matu phyn aw tihe mah on mah dot u lah sih.

Seel lawng amah awl la rung tih “maw”, Marang lawng amah awl la “hii” tih pang, Tahaikung lawng thuithii thaih la thaih thai nawh tih, manaikung lawng dingkii thaih la thaih thai bal nawh. Thlangbawkw nokna ming khy syn “Mr on Miss” ming hur tih thutna lawng he thlangbawkw phyn la n’cong sak thai he manawh. Chin ming nokna zyangah “Mr on Miss” taina lawng he “Salai on Mai” sawah samphaih nala awm. Thlangphyn tlo ming tai tih thangpawm khing lak a tah Chin ming nokna “Salai on Mai” he tai tih thangpawm ham la tyng. **“Lawngzam ral lawng rahhap pum zoinu tengah loh nokna thlarui thiim a zansak tih lohna a huh”**. Tetih angla chin ming nok taina lawng ram on phyn a pawm sang tih thang a theen sak.

Rev. Paham Ngaitiim kah kawngthu a tawi

Rev. Paham Ngaitiim he tah 13/09/1931 kum ah Pa Reng Tang lawng Lalui khawzun a cukna u cyk khawkha im hyn ah cun la awm. Khawkha im hyn tengah lou hyn van pakhat awm tih, te hyn te Ngaitiim van tila ming khy la awm. Tetih angla Paham Ngaitiim ming synna he tah te kah khawhyn van ming khy synna la awm.

Camaw veng

Rev. Paham Ngaitiim he Pa. Thangto on boinau hih the tih Pa. Thangto tah a ham cala awm. A boinau rawi ah Nu on Pa a rih hih tih awl kaa ka ngaai thlaangla awm hih. A pumrawi he zit hih tih thlaang kak hep la awm mai ca khaw seh yp awm thlaangla awm hih. Puipaw on lym hang vengah khaw seh khawbo theenna on dungvong khawdawp a ngaai puipaw kut thung vai nawh tila ka lym hang haihthli lawng thui la awm.

Catuk a tawngna

Ana pa Rengtang lawng a carawi te a khy tih a hai ah a ngawlh sak hih tih na boinau rawi ah u nym ca ka tuk ai tila a dot. Kum 14 aka law a canoi Ngaitiim lawng, “A pa kai sengim ka kai ai” a

tina tih a ham ca Thangto lawng tah, “Apa kai tah anu on apa nang hih bi ka bawmkung la ka awm ai a tina hih. Tetih angla Ngaitiim tah a kum 14 cadawng khong 1945-46 kum ah Anthaw khaw saza Ruitang tengah sengim kai cyk. 1946 kum veng saza Mathaw on saza Taitu kah Pathen awl tuk kikna rang on Krica la kun.

1947 kum veng Lalui khaw kah Paham Tlunglai lawng Mizoram la a ceh pui tih Lunglei, Aizawl, Sairang on Silchar ram kekvang a hil la awm. 1949-50 kum veng Tidim, Lungbang, Falam “Motor” manglai lawngpui ka dengthli khawl cuikung la awm. Te kum veng mah khaw la voi tih thapang dang myh la Krica khawl cuikung houtu la awm. 1952 kum vengah Valangte khaw kah Nu Lensup on pumkhat cong ham zu a lawh. Te kumah Paham Thatdun lawng Lalui khaw “Tui aw” sawk ah Bawipa Jesu ming on Tui a nym. Evangelist ming on Matu ram boih a hiil tih thlakhat ah Ks-10 thapang peek la awm. Saza. Thangkhung on bawm hih the tih Lalui khaw ah Krismas poipui a sai hih tila a cabu thut khui ah huh la awm.

1953 kum veng Hakha ah Missionary Rev. John Son tengah baibul sengim kai tih 1954 kum veng Mizoram Lunglei ah kop kai bal. Hakha ah baibul sengim ka kai haihthli hy tah-

- 1.Saza Ngai Tiim (Lalui)
- 2.Saza Thang Zen (Luivang)
- 3.Saza Khaw Sy (Kola)
- 4.Saza An Cang (Vapung)
- 5.Saza Reng Ma (Cangtaak)
- 6.Saza Pii Thai (Awkla)
- 7.Houtu Pin Tui (Valangpi)



he thli on sengim kai u haih la awm.

Matu calung tawngna

1953 kum Hakha ah Baibul sengim a kai na mission Rev. John Son zuva ha tlak puina on matu awl lung alphabet tawng cyk la awm tih Hakha, Lusai, Pathen laabu khui kah a colh laa (283) matu awl la a leh tih 1961 kum ah Falam khaw ah laa cabu bolrai thaila awm. Te veng ka lawng Pathen cabu ciim khaw matu awl la leh a tawng pa hoi la awm pon.

1959 kum veng matu ram ham laa Bute (No.100) Hakha A.B.M Presbyterian lawng a leh sak.1965 kum veng ah laa Bute pabena Z.B.C (No.305) he, Pathen lawng athangthui na aleh pe tih, kum (6) kadiu tih haitui pungruk van Pailang kung la ka phiyh tih ka boih tila a mah thut cabu khuiah thut la awm. Pabe a leh laa Bute Falam khawpui ah bolrai la awm bal tih Leiring khaw September (12) ah Pathen teng nawn thai la awm. Rev. That Dun Golden Jubilee cabu columns pathum page 36 dawng ah a thut.

Bibi tykna

1954 kum veng Valangte khaw tunpui ah akhui bibikung (secretary) la a tyk u. 1959 kum veng Zo-Matu Association tunpui Kace khawah Rev. That Dun lawng Saza Sating on Pastor ordnance a peek hih. 1960 kum veng Vangkai khaw ah

CEC President la a tyk u bal, 1963 kum veng Matu Baptist Assiciotion la pai u tih Leisin khaw ah tangka kym kung la a tyk u. 1968 June thla Leiring khaw tunpui veng Lungpel Baptist president la a tyk u. 1970 kum veng Lungpel Baptist eria Sunday School ka tukkung la a tyk u. 1972-75 MBA president la a tyk u bal.

Rev. Pan Kym on Rev. Ngai Tiim

Rev. Ngai Tiim on Rev. Pan Kym lawng Vapung khaw Baibul conference ah Rev. That Dun on Rev. Pa Hrek awl a dot hih.

Thlangbawh- Namah khaw on Ram la na mel tang ai aw? That Dun - Nanhek u atah kamel hang ai, nanlungna u atah akan la rop awm tih Maturam ah luu up ham ni ka mengteng ro ta atina.

Thlangbawh – Pa Hrek nang taa a ti na hih bal?

Rev Pahrek - Kai van khaw taa n'ti na.

Thlangbawh –Kai hih lawng nang hih rawi tah Paham, Patyr, Pacut ming kan syn hih pon ka ti na hih.

Paham Rev. Pahrek lawng Paham Rev. Pan Kym a cang hawl na tih, Paham Rev. That Dun lawng kai n'cang hawl na tila That Dun Golden jubilee cabu columns pakhatna Page 38 dawng thut la awm.

Abi tyngna

1951-58 khui ah Daai peng, Matu peng, Arakang peng khaw (80) boih hil la awm. 1959 kum Kace khaw Pastor ordnance a huh pek cong ka lawng 1984 kum Lalui khaw Rev. Ngai Tiim Silver Jubilee asai hin to khui kah Pathen bibi a tyngna tah a dang ka angla awm. Thlangmi 3500 Kri cala a kun sak. Thlangmi 50 pumkhat congna kut a tuk sak. Thlangdyk 200 a vui thai. Thlangmi kum 13 saw 2070 tui a nym thai la awm. Buzi Thai Cong he azu aka bawk thlaang la awm tih atlo Pastor hy lawng tui nym hamla ngaihpuu u nawh tih, kum adiu la tui nym huh myhla put awm. Thai Boi khaw tunpui ah Rev. Ngai Tiim lawng tui nym apeek thai. Pathen bawk im thai 35 thawhkaa awng thai la awm. 1984 kum Lalui khaw ah Rev. Paham Ngai Tiim kah Silver Jubilee sai thai la awm. Teveng kah Baibul suttung la a tai tah, “Tlang sawm a cuungna kok ah ihcon na sai tih, amah teah bulna luciik nawn hamla na luui hang”, (Isaiah 57:7). 1948 kum Silver Jubilee a sai cong asaw ben kah bibi nathli tyng sak thai la awm nawh hyn.

Thlimsangna

1946 kum Rev. Mathaw lawng Kri cala a kun pui cyk tih Baptist thlangbol khui ah kum bro nawh Pathen bi ana bi hang. 1962 kum veng Maturam ah thlimsang va tla cyk tih Rev. Ngai Tiim, Prophet Cang Voi, Paham Tlunglai, Paham Laa Pawng bawngzawng u tih thlimsangthli te a khawl cui u. Prophet Paham Cang Voi tah thlangtlouthli a hoih sak tih thlangtlouthli khawl cui kung la awm. Rev. Paham Ngai Tiim lawng thlimsangthli te a khawl cui tih, “Thalam thlangpor” ah hin (40) cakzeh thangthuina a khyh veng Bawipa lawng Laa a pek tah, “**KABAWK DYKNA TLANG KALVARIANGLA NI KAI TAH KA RAM KA THIN TLAWHNA**” a peek. Te kah laa on thlimsangthli te a khawl cui tih a cun a cah.

Thlangbol kunna

Rev. Mathaw lawng Krica la a kun pui cong Baptist thlangbol dawngah Pathen bibi ham im tung a sut cyk la awm. Rev. Kap John lawng Maturam ah thlangbol thai EFC a syn tih 1975 kum ah EFC thlangbol ah kun. Te thlangbol khui ka lawng 1984 kum Lalui khaw ah Silver Jubilee sai la awm. Rev. Chan Thleng lawng Maturam tlaih vawng pan UCC thlangbol a syn tih 1985 kum ah UCC thlangbol la kun. Rev. Len Thang lawng Hubang thlangbol a syn tih 1994 kum ah Hubang thlangbol ah kun bal. Rev. Bong Thang lawng Ngaiyp thlangbol a syn tih 2001 kum ah Ngaiyp thlangbol ah kun. Rev. Ngai Tiim tah hu khyng kok Ngaiyp thlangbol dawngah taai a khaih tih ngawlh hyn a bot sak.

Pathen lawng a phawng pe

Rev. Paham Ngai Tiim lawng manglai lawngpui khawl cuikung la a awm veng thlot thlot a thyn rui la Pathen teng athangthui veng Acimmuithla lawng a phawng pe tah, Hekah thaihuthli aka pai puikung lawngah, “Oih, ka law zy pon ai,” tila (awlphawng 22:20), Amen. Bawipa Jesu valaw zy loih. Te awl lawng cai angla a thun kok la awm. Thalam tlangpor ah hin 40 cakzeh thangthuina a khyh vengah Bawipa lawng a pek laathli tah,

1. Ka Bawidykna tlang

2. Karam sai nou on a thlotli khaw pek la awm bal.

Im khui kaw dykna tlawt tlawt a tawng veng Bawipa lawng a peek Laa tah, “**Zion ah Bawipa awm nawh kai aw**” ti, Laa he peekla awm tih te veng ah Rev. Paham Ngai Tiim lawng a thui awl tah, “ka zu ka cathli a dyk veng kawthee lak ah cunkung a nu a dyk veng kakaw thee ngaai” tila a thui.

Baibul catlang

Rev. Paham Ngai Tiim kah a ngaih kok Baibul catlang tah,

1. Me ang thaihu khaw na sai u vengah, thlaang bi aka bi angla pok myhla Bawipa kah bi aka bi angla, na thinkaw boih on van sai uh. (Kolose 3:23).

2. Ng'hu vengah, thaihu boih aka synkung Pathen dawngah thut la aka awm, he awlhyp kah bibina he thlaang boih tengah a zooli cala mingsak hamla ni. (Efesa 3:9).

Thangpawmna

1984 kum Lalui khaw Rev. Paham Ngai Tiim Silver Jubilee thangpawmna cahawn, 1994 kum Matupi Rev. That Dun Golden Jubilee thangpawmna cahawn, 2005 kum Matu awllung (Cape) Singzo Committee thangpawmna cahawn, Rev. Bong Thang lawng thangpawmna cahawn. Hetih la ahing khui Rev. Paham Ngai Tiim lawng amah ting tawk kutdou thangpawmna cahawnthli he dang la awm.

Au cakhaw he kah Thalam tlangpor dawngah awl thang kali thunsak van hamla aka ngaih thlaang a amatah thun thai van tite kan zaksak.

Bolraikung : Salai Thalam Sawngpai

Email : thalamtlangpor@gmail.com



RAALKAPA CAWI KOP

Salai . Thalam Sawngpai

Kawl thlangphyn thum myh la aheh avai kah ka awm thlangphyn thlothli on Chin kang mah Maturam Dom peng khuiah 2009 August thla dawng raalkapthli lawng raalkap la kun sak ham thlaang a cawi tih, Valangpi, Valangte, Cangtaak, Leisin, on Lalui khawkhatah thlang mi (10) sop sak ham sawben ka lawng khawbawithli kut ah awlpeekna akhyh ti la zaak la awm. Tedawng kawl raalkap bran kah pawngthawnathli rui him la awm veng a paihyn khawphaa khawleh cak sak thai tare naham a tyngsak.

2010 kum veng kawlrang tung ukna on ram saithaina a colh Democracy party cut met sang tih bran thai paipon ham mengteng thil tang tang kawi nih raalkap pingte a zawl ngai la voih tih hot ham awm pateng. Tetih angla raalkap pungtaina ham thlang a cawi na he dyh dah veng 2010 kum party cut met sang ham koi dawng yp awm nawh on ngai yyp ham koi la awm nawh.

Hilhdam lungpoong Im

1985 kum Maturam tlaih vawng panna thlangbol Christian Reform Church (CRC) Founder Rev.Dr. Chan Thleng kah azu Mai Haani tah Rangon Khawpuiah tlongkholh Eden awmthen hynah dungzan dyymna a huh pon. Rev. Dr. Chan Thleng kah a zu Mai. Haani lawng dungzan awmthen hyn a dyymna kumkhat a cup cong Apabena azuthai tah cakaw pring Krica thlaangbol boih kah hatlaak puina rang on Paletwah Peng Pii khaw kah Mai. Mendyng on Bawipa Pathen Jesu Kri on Krica thlaangbolthli boih haai ah a ciim kut tuukna saithai la awm.

Rev. Dr. Chan Thleng lawng azu Mai. Haani hilhdam lungling zyng Matu khawpui khuiah lungpoong imconthum (3) asang la sak ham atawnglii la awm tih,

1. Imcon pakhatna tetah Shalom tuisi tui ai rek raana ham.
2. Imcon pahihna tetah cabuu cabelthli khyhna ham.
3. Imcon pathumna tetah thangthuina hyn ham,

Tila rokbah tih bolraina on lungpoong Imcon tah asak lii la awm pon tila 2009 August thla lunghang groups dawng a hoo.

Rev.Dr. Chan Thleng lawng azu Mai. Haani hilhdamna lungling zyngah lungpoong Imcon thum kasang sak ham kam thlahna ka awm he Maturam khiu ah athlok langloo cala khawkhan kamthlah synthai pakhat la awm. Azu dykna on upna hyn Rangon khawpui khiu ah Hilhdam lungpoong imcon sak ham koi tyng te Maturam ngepace lah lungpoong imcon sakna lawngah Maturam on Matu thlaangphyn alungna tihe adung la a tyng sak. Tedawng ning Matu thlangcuihthli on kuirang thlanglenthli boih lawng khaw seh khaw ram on thlaangphyn thin tlawhna tih pawmsang on haai la khawkan dong sak u van pon sih.

Cangrawm kawng

Maturam ah louton lak cangrawm tawh ham bran lawng a hona ang la kum 2009 ka lawng a tawng tih louton lak ah cangthen ngaai tila athui. Canghawk ka lawng atah khawrok lawng cangrawm tawh pon ham he then tila a thui u.

Paangna on tyng sakna

Kawlrang thlangphyn boih independent (or) zalpaw loihna ham sazyp pa lawng mawlsawm ka hung sathang Cungtal athlom ang la Aung San lawng kum bro nawh athlom tih akah tong long pon. U Nuh lawng a ngan aphut tih ahak. Newin lawng Alu adong tih atai. Aung San lawng ih myh lou nei tanlan myl kolh tih akah Democrecy sathang cung lu lawh kop tih langzaa lang dai ah tai ham a canu Aung San SuKyi lawng ral kap teng a bih kop. Aka song apai pui tih Democarecy cunglu bih kopna dawng Daw Suh tah kawl baran lawng kum bro nawh airawl khiu aup tih im khiu

ah a tung ep. May 3th 2009 kum veng Daw Su tung ep im khiu ah American nam Mr. John William Yetaw a hyp la akun dawng awl cekna atawng. August 11th 2009 kum hin ah Mr. John William Yetaw tah kum 7 khiu ah airawl up ham awl atlok thil u tih Daw Su van khaw kumkhat cong thla 6 khiu up ham awl an tok thil u. Kawl baran lawng a lawng im ka song rule te a kan doop tih amah ngaihna on asong ka paipui Daw Aung San SuKyi airawl khiu up kop awl tlokna te UNO diklai pum lawng azaak tih zakming tare thaina ham kawl ram tung UNHCR rainathli lawng 12/08/09 khawhin veng New Delhi India khawpui ah thlangping pangna on tyng sakna a khyh u.

Caming rou peek vol.1.Issue 3 cawngna

Caming lawng Pa kah rou pangkung la awm. David tah Pathen lawng alu saw ah situi asyyp tih Isreal sangphrang la atyk. Elizah lak ah Elisa lawng let hih la kawpok rai saithaina Pathen lawng apeek. Paham Rev. Ngai Tim lawng khaw rook athlaangbolthli hipna hyn kung rok a ceh veng, Pastor Hlamuan tah hubang thlaang pakhat la awm. Hin at tah khawthun khawling lii veng thing khuup ah dym hih. Teveng ah “Paham, kai ham tu khaw na van khyh tlaih nawh pon ai aw?” tila Pastor Hlamuan lawng awl a dot. Teveng ah Paham Rev. Ngai Tim lawng awl a vol pe tah, “Evan. Pa Hung he Caming “Rou” ka pek tih Evan. Shwe Mawng he canoi “Rou” ka pek tih ka tyk pon” ati na.

1962 kum thlimsangna apai veng thlatan khaw thlimsangthli thangthuina hyn te Paham Ngai Tim on Evan. Sui Mawng lawng kop a hip hih. Te hyn apha veng ming nawh awl la acal hih li veng paihyn ka lawng Paham tah diklai dawng tlim tih hilh u zawh. Raih a awm cong aralh hyn ka lawng thou kop tih Evan-Shwe Mawng te akawp hat lat. Tevengah Paham Ngai Tim lawng akaa aang tih Evan- Shwe Mawng kah akaa khiu ah zilh a yng tih asang pee. Huh sakna tah Caming Evan- Pa Hung huu thooi Canoi Rou peek huh sak nala awm. Teveng ka lawng tawng u tih Paham kah athawh tat zang thai tlaih nawh tila Evan- Shwe Mawng lawng thui la awm.

A tlawh tawngna

Matupi khawboi hyn ka lawng Thangping khaw, Tinglawng khaw on Lalui khaw athlangbolthli hip ham la kam thlah tih mincang aceh tawm khawnoklung 10 aty veng im hai ben motor manglai lawngpui ngom hui ah khawsee a eng liveng atlawh lawng ake tih apai hyn ka lawng tlim. Acanu Raizul on imbe thlaangthli lawng a sambai u tih apum vang tah dyk pahoi tih tait thaitlahi nawh. Tevengah a kut vang on khawlaw ben a khi tih azahvaih a roh. Shan ram la a ka awm a capa Ralmawng he van khyy u loih tila aka sambai hy lawng a zak ming u tih acapa Ralmawng te azaak sak pahoi.

Aka sambaitthli lawng Matupi si im pui la a heng pui u pahoi tih awl cal thai tlaih nawh tih tuibe lunghang khaw seh aw thai tlaih nawh. Aha rawng khiu ka lawng paih on vaitaw suktuithli te a awk sak u. Hingpat, khumpat myh la khaw hin 10 khiu khawdeng patang aming lii veng Shan ram kah ka awm a capa Ralmawng lawng a van ke tih amik khah rung tah a van ke de Paham kah awl cal tah a zaak thai tlaih nawh veng ngai thlivh on a kaw the. Cakaw phring on Maturam kah aham ca houtu Pastor thli boih lawng mik hai huh sop thaina ham Pathen lawng si im khiu ah Paham Rev. Ngai Tim kah khaw hin 10 khiu ahing lung apaih pe tih 03/12/2005 khaw hin a tah Pa Pathen teng Dungzan dymna a huh pon.

A Cathli

Bawipa lawng zouthen peek a cathli tah a dang ka angla cunla awm.

A capathli	1. Even. Thang Awm	Evangelist
	2. Pastor. Raal Mawng	Missionary (shanram)
	3. Pastor. Van Ngai	B.Th,B.D, M.Div
	4. Salai. Jacob	
A canuthli	5. Nu. Nu Rii ,	6. Nu. San Rem
	7. Nu. Rai Zul ,	8. Nu. Mar Taa

Rawk bur hin

Paham Rev. Ngai Tim kah rawk tah thlangbol rok kah houtu Pastor a ham cathli on cakaw phringthli lawng a thangna Lalui khaw ah rawk khyn nawh ham on Matupi khaw pui ah up ham koi dawng thui ngawngna a khyh u tih Matupi khaw pui ah rawk up ham la boih a kaw vai u. Te tih angla Paham Rev. Ngai Tim kah a rawk tah Matupi Lawngvan, Pa Rengzau im khuiah helh la awm. 04/12/2005 khawhin Pa- Rengzau im khui ka lawng rawk a sin tlak pui u tih Matupi Khawboi, (New hope) Ngaiyyp thlaangbol Bawk im khui ah lamha cyk la a kun pui u tih Ngaiyyp thlaangbol a ham ca, Rev. AmosThang Ngai lawng paicon saw pai tih mik phi copcop awi rui la a ty a hawna. Ngaiyyp Bawk im khui ka lawng Pa tong Matupi Cangbawng, (MBC) Bawk im khui ah kun pui la awm bal.

A hyn - MBC Matu Baptist Local Church

Khawnok lung - 1 : 00 pm

Kum - 04/12/2005

Bawk im pumna aty

1.Mawt kung	-	Rev. Moses Lavoi
2.Tawngna thangthui kung-		Rev. Amos Thang Ngai
3.Rangpui laa sakna	-	Ka Bawi dykna tlang
4.Kawthee pui cathut tokna	-	
5.Awmngaih ciil thuina	-	Pa. Rengzau
6.Akawngghu ca phaina	-	Rev. Biak Sawm
7.Hilh dam raipai kor peekna	-	
8.Solo	-	Khin Yee
9.Hin zahna Darkhing tum voi (53)na-		Rev. Thuk Leng
10.Solo	-	Mai.Thendik (Ram zouthen kok lairam)
11.Zouthen peekna	-	Rev. Thlou Zeng
12.Phungthuikung	-	Rev. Sui Hre
13.Pum bot zouthen peekna	-	Rev. Cang Lung

Hilhdam raipai kor peekna

- 1.New Hope Church
- 2.Im khui kaw (Lalui)
- 3.Evan.Pa Hung
- 4.A cathli
- 5.Khawpui Baptist MBA (Cangbawng)
- 6.Matu thlaangbol cut MTCC
- 7.New Hope Church (Rongthai)
- 8.New Hope Church (Nu kaw at)
- 9.Zoutung Baptist thlangbol
- 10.C.R.C thlaangbol
- 11.Matu Cape Hui at
- 12.Pa.Laipoi on Nu. Congpok im khui kaw
- 13.Lalui Ongca pawl nengna
- 14.Immanuel caphai seng camo
- 15.Vakawk caphai seng camo
- 16.Pa. Rengzau im khui kaw

Rawk upna - **Rev. Khaw Sy**

Pa Thangto kah capa Pingsawng lawng Paham kah sam ka reet tih Lalui khawah ka up van tila athui.

Bawi vaa

Paham Rev.Ngai Tim lawng bawiva khui ah Seel ton he a tha thly

pui kok la awm. Kudi tuiva siip thangping khaw,tuirum tah a hyn mawl nep thlang tih Seel ram caak ham koi he then tang kik .Te dawng Lalui khaw kah Seel pingthli khaw nep u. Tui lenty kum rook maythla bot ben veng Lalui khaw hyn la Seel pingthli te ka vai u popa.1988 kum veng a tah pil nam on uk kungthli lawng khaw hyn khui ah Seel ton tlaih nawh ham awl topna a khyh u. Paham lawng bawiva he a thlah dam tih Seel zyng la Panaa he tlop a ton.A mah he tih la Paham NgaiTim lawng im lou on ram hum ram mawl kah bawi va khyh ton na thli he caal cal la a thin tlawhna tang kiik la awm.Thlaanghing lawng Paham Ngai Tim he n'thin tlawhna byng khok ouh la pawngsa ram sa bawivaa lawng ah khaw seh a ben a baw tih bawiva a khyh ton thli he caal cal la pung thai.

Dum

Paham Rev. Ngai Tim lawng bawiva ton on dum khyh he a hing khui ah a tha thly tih a tui pui.Thingkung on raipai kungthli a lungna tih im lu,im hai ben on im le benah thingthaih kung on im a cung vel pik.Im kak ben dum khuiah khawcui, khawhal ka thaih koi thingkung phyn soprep a ling.

Asing sawk soikaa ah thuihikung dil zahawh thlang a ert.Thuihikung dil a vang hy tah Asing dupdawn saw khaw hyn vaan, dum khuiah a ling.Avan hy bal tah lalui pilnam,khawtlo on Matu khawpui thlaang lawng a lai u tih aling u.He tih la Paham Ngai Tim tah pum sa ben bibina on muithla ben bibi bawngzawng haih tih tha rang thlaang pakhat la awm. Pathen muithla Bawilenna on Pumsa ben bawilenna kova za hawh ka khyh thlaang pakhat la awm.Vangkhuah ah Cangpai zahawh ngaii ka khyh thlaang la awm bal. Bawivaa khawl cuuina on Dum lou khui kah thingthaih rampu on thingkung rawkung a cil po na lawng Bawipa bibi pumkhat thlaang bol im khui kaw huh sak thai tare la awm.

Awl dotna

Kudii sip Thangping khaw hyn ka lawng Seel ping ka vai u tih khaw thun buh cak cong ngawl tun u veng Seel ton he na tha thly tih tuham la khyh na ngaih tila pakhat cong pakhat awl dotna koko ka khyh u.

Salai Sawngpai- Tu ah Seel ton he na tha a thlyna?

Paham A pat lou tul paw tlop saw ka lawng ka Seelthli a ming on ka khy tih lung keh ka tuhna he ka tha caal la a van thlysak.

Salai - Lung keh na tuh tih na khawl cui veng tu khaw na pok?.

Paham-Ka Seelthli ka khawl cuui na dawng thlangbol on tuu donkung David kawngghu ka pok. Hin at hin a tah raw pawk khat ka kawh tih ka mel lam ah Asing dup dawn saw khaw hyn vaan dum (taal paw) thawkaa kengah pai tih kan caana seh ka dum taal paw khup khui ah dym de n'ri na. Raw pawk te ka hal tih taal paw khui ah ka kun. Mik huh thai huthli tah Paham lawng lu a tlongna thing bong ngawn con on dum vawkna vin pui pakhat a tlong te ka huh, a ralh con sawah a leng vah sungsa a hoi. Mathai, mark, luka, cabu ca a pawm te ka huh bal tih te hynah awl dotna kop ka khyh tah,

Salai- Tuah dum khyh he na tha a thly pui?

Paham-Thangthaih kung lawng kaw'rai rawtui ty vengah aram sai nou mothli lawng cawn tih dik dik sai hing te ka dan veng ka tha thly.

Salai- Dum na ceh rok ah tu khaw na pok?

Paham- Dum khui kah thingkung a sai nouthli ka dan tih akung ka cil pona lawng mathai 20:1-16 misur dum khui bibikungthli teng Jesu lawng thuiytna awl a thui te ka pok. Awl dot a bot ben ah heti la awl van thui Thalam tlangpor hin (40) cak zeh thangthuina ka khyh li veng khaw cil ping damtui baw nawh,tevangah ka ngawl hyn ka lawng huben la ka mang tih thingram ka reu saw kah tuicil rik ka bym te ka huh, te tui te paleek zuva rawi lawng a leh hih te ka huh.Telawng ka hingna dawng n'cangpui tah Bawipa tah kawpok rai sai thaikung la awm tih ka awn nawh a hawng thaihu khaw seh huh thai on tek thaikoi atak la ka cong sak thai Pathen la awm tihe kahingna dawng van phawng.....

Email : thalamtlangpor@gmail.com



MATURAM

Maturam he cal la khaw sak awmthen tangkiik. Thlanghing khaw sakna ham khaw bro nawh la nep. Tui thing khaw da, ' mawl me, tlang a da van angla thingpai rawpai , thingthaih rumpu a da dawngah suva on pawngsa ramsathli lawng a bur u tih , suva lawng Maturam a awm then sak. Aming ka thang tlangthli tah Kai si, lungpeel, kanglawng, laicang, lingkee tlangthli lawngah Maturam tah khop acung vel. Tecong aming a ka thang Tuivathli tah Kudii, Vatlawng, lemrou lak lawah Maturam tah tlong u tih tuiva keng kah lunglai tah laikawk la theen tang kiik tih khampa Boira on sumdeng kawltthli he a ming ka thang laikawk pakhat la awm. Maturam he lunglai a ka theen ni, khaaw sik tuk nawh, ling tuk nawh, khaw ty khaw cang khaw seh bro nawh la theen. Maturam kah ming a ka thang kok tah Bungthla Liksai he ni. Acon (9) law tih (Electric) hai vang la ni sai thai kawi nih kilowatt (260000) thlai vang thai ai tila thlang cuihthli lawng a thui.

Maturam he lou ton za hawh dawnah cang on vaikym vai haw then tangkiik. Apat ben atah See cava on pupi im la buh cun ai hai on an thun tih huui tai im la cet u. Vahthawk vahthla atah zu suk selpel poi caak on awm then a bon u. Loubah khawtheen atah loulaam on thang sak tih dengke a kah u tih awmngaih awmtheen on loulam zut zut thoi u. Kamzin kamlai a law veng buh cala rip akhy u, im be louvaithli tawi an dou dan u the, dyk hing vengah khaw bawm cem u tih rawk ram vengah a mah imlou la khom u myh la rawk imah rop awm u. Khawhaal hung kang atah tuihawi rasak on cadawng hulathli lawng awmtheen a bon u tih tha hong ming myh la thlemben ah im la zutzut mel u. Dilung Dilai on rop tih khaw sak awmthen thlang Maturam.

AWLROKNA

Maturam he Kri ca la awm congah kum 1956 September (14) vengah U Tumbal mi lawng C.E buu te a sai u tih Maturam khaw rook kah rongthaitthli thik at la bawngzawng u tih pum khawm na benah, bibi na benah thinkaw khat la hawl u tih thathly thakaw, awmngaih kaw hoo byh ngaih awmtheen la Maturam a pai lum sak tih a thang pawm u. (C.E)bu lawng Maturam kum san thlang a mawt tih 1960 kum vengah (C.E) bu lawng tunpui (civui)a sai u cyk tih sut tung la (Matt 5:14) atai u tih, mawt kungla Rev.Ngai Tim te a thai la kop a tyk u. 1963 ka lawng a tah pek bounathli te awm pon. 1965 vengah Matu Presbyterien la awm tih te ka lawng PYF la awm hang u. Te ka lawngah Matuca rongthaitthli ham lawngpui ka thy pe hai thoi la awm. 1966 vengah Saza Thangkawl lawng Sevenday bu van khyn, 1967 vengah Saza Kapzawn lawng (EFC) van khyn tih 1985 vengah Maturam tah Dr.Rev.Chhan Thleng lawng van tlaih pan tih (Reform)CRYF lawng a mawt hang bal. Thlaangcuih mik tyng voh voh awm hang van pon dawngah YMCA te Saza Han Tai lawng kop sai la awm bal.1999 kum atah khaw rook lawng a theen thaihu sai a ming van pon dawngah Rongthai boih te pai thai la awm. kawlr am uk na benah a lawlhmaihna a awm dawng ah khaw khat on khaw khat te tuh kaai u thlan hyn. Tu dawngah ti atah bran ukna dawngah , mawtna a lawng a im ming u nawh dawngah bibi cet thai nawh. Te dawngah a ham cathli lawng kum san thlang a mawt u pon de mawtna cabu a awm nawh dawng tuili dyk on lou u. Te dawngah bolrai kung kah ngaihna myh la Maturam lawngah a ngo pon dawngah 2008 August (8) vengah

(MCYF) Maturam ham a kua ngai la bibi na ham, he mawtna cabu tah sai la awm. He tih la mawtna cabu he bolrai la a awm vengah vot thokna awm ai, hai ben rongthai lawng tlaih vawngna awm badai tite ngai ypna ka khyh. He mawtna cabu sai veng ka cong thaina ham ka bolrai pui kung Pastor Hlamuan sawah awmngaihna ka khyh. Kam thlahna angla ka cong sakkung Pathen teng awmngaih cil ka thui bal.Maturam rongthai lawng thadyng thai kop hyr u sih.

Matu Krica Rongthai Fellowship

Matu kri ca pawl nengna lawng he khawsak ramsakna dawngah, awl ka benah, Matu sing zoo kym sym ham on yp awm la awm tih, hai benah tha hyr ham, he mawtna a lawng a im he sai la awm. Hai ben ram lawng a ngo bal atah he lakah a then ngai la tahe kah rongthai lawng vansai ngai ai tite ngai ypna ka khyh.

A ming

He mawtna a lawng im tah MCYF mawtna cabu a ming la awm. He mawtna cabu he MCYF khui byngah ni hawna thai la meng teng thil la awm.

Mengtengna

MCYF he tah pokna pakhat, huhna pakhat, Saina on Matu sing zo te kung sut tih roong sak ham awlpui la mengteng thil la awm.

1. Kamthlahna

- (a) Ram on thlang phyn lungna tih thangpawm ham.
- (b) Cuihna benah thahyr ham.
- (c) Khawra awmtheen sak ham.
- (d) Zouthe zouthen vengah bawngzawng u tih bawm cem ham.
- (e) MCYF he bu la awm nawh tih bran ukna on khaw tuh kai u nawh ham.
- (f) Nupa kah singzo he Kri phung on ka vai u la sai ham.

2. Hynpui(Office)

MCYF kah hynpui te tah Maturam kah khawpui khui ah khyh ham.

Peeng bolraina

MCYF kah peeng tah adang kah angla bolrila awm. He peeng lawng he amah kah khaw rookah (local)amah pok la pai u ham. Khaaw rook lawng a mah kah pengah tuh kaina boih sai la awm seh. Peng pasarih (7) lawng Hynpui ah tuh kaina sai silang kumkhat ah tuh kaina ks() a sai ve tih kumkhat ah vaai Tumpui(conference) sai ham.

- (1) Cing (CCYF) (2) Dai (DCYF) (3) Dom (DCYF)
- (4) Ngala (NCYF) (5) Kawnglawng (KCYF)
- (6) Ta Aw (TCYF) (7) Thaiphym (TCYF)

3.Mawtna a lawng a im

- (a) MCYF mawtkung kah kum te tahham.
- (b) MCYF kah rawihuuikhyh ham.
- (c) Mawtkung tyk vengah thlaang zahawh kah ha tlakna ang la tyk la awm ham.
- (d) Mawtkung tyk veng amah a awm nawh a tah tyk thai nawh ham.
- (e) MCYF rawihuui (committee) lawng mingpui nawh atah amah pok ah rawihuui ka lawng dym thai nawh ham.

(f) Mawtkung pakhat te bibina dawng, votthokna a awm atah thlaang mi lawng cawt bauh thai la awm.

4.MCYF mawtkungthli lawng kymsym ham koi

- (a) Zu, Phe, rui thai koi thaihu ka tek nawh thlaangla awm ham.
- (b) Rawihuui on thlaangmi lak lawah pekbounda khyh nawh ham.
- (c) Kasong nawh sausi la pai nawh ham.
- (d) Zu zoih nawh ham.

5.MCYF mawtkung tykna

- (a) MCYF mawtkung tah a kum..saw on ...to tyk thai la awm ham.
- (b) Tangha ka awng thlaang la awm ham.
- (c) Matu thlaang la awm ham.
- (d) Ram on thlaang phyn ka lungna thlaang la awm ham.
- (e) Matu awl, Kawl awl, Thlaangbawk awl ka thomthlaang la awm ham.

6.MCYF thlaangmi (member) thli lawng vaihamkoi.

- (a) MCYF kah mawtna alawng a im he zakming boih la awm ham.
- (b) MCYF kah mawtkungthli hinzahna khyh ham .
- (c) MCYF ngawlh tun veng thum popa ham .
- (d) MCYF thalakna ah thumpopa ham .
- (e) Vangkhuui zoutho theen a awm veng a the thai hu sai nawh ham.

7.Tolthamna

- (a) MCYF mawtna ka vai nawh te tolthamna kyh ham.
- (b) Te ni acong nawh a tah sawben ka lawng a ngona angla sai ham.
- (c) Toltham thai la a awm nawh atah Rawihuui nawh tah thlaangmi lawng dyym ham.

8.MCYF hin(Day)

- (1) MCYF paina khawhin te Maturam on khaw rook lawng (Birthday) khaw hin la hawna ham.
- (2) **Kutdou peekna awm ai**
-Tangha ka awng
-Degree ka lou(lummyk kadong)
-loh langna awm ai.

9.MCYF kah thaihu

- (a)MCYF cadenglung (Seal) khyh ham.
- (b)MCYF kah thaihuthli tah mawtkung lawng kym ham.
- (c) MCYF mawtkung kah ming myh la thaihu saithai la awm nawh ham.
- (d) MCYF kah thaihu vat tih a pawci sak ouh mai a tah ka vatkung lawng hutna ham.

10.MCYF kah tangka paisa kawng.

- (a) MCYF kah tangka he mawtkung khui kah thlaang khat lawng kym ham.
- (b) MCYF kah audit theen khyh ham.
- (c) MCYF kah tangka te bank ah khyh ham.

11.MCYF thalakna

- (a) MCYF lawng kum khatahthalakna khyh ham.
- (b) MCYF lawng anga a ngaih a tah n'khy thai la awm bal.
- (c) MCYF ham la u ca lawng khaw pesengna akhyh thai.

12.Zulawh vasakna

(a) Khawkhuih cadawng hulathli zulawh, Vasakna a awm atah mawtkung teng opsoh la zaksak ham.

(b) Kri phung baibul tuuk kiikna angla nu, pa , hatlak la zuva u ham.

(c) Khawkhui kah MCYF lawng awmtheen la thlah na sai ham.

13. Cadenglung (seal)

- (a) Khawrook
- (b) Khawrook peng cut.
- (c) Pengrook hynpui.

14. Cadenglung (seal) khuiah thut ham koi

1. Lawngvan (LCYF)
2. Luivang (TCYF)
3. Tawngku (TCYF)
4. Ngaleng (CCYF)
5. Amsawi (DCYF)
6. Valangpi (DCYF)
7. Leiring (KCYF)

A saw kah peng mingthli boih he cuut u tih MCYF tila hoop la awm.

15. Pumty

- (a) MCYF khawrook lawng zarkhat ah vaikhat pumna khyh ham.
- (b) Ahamca lawng thui tynna khyh ham.
- (c) Mawtkung Hotu, Pastorthli lawng Patheen awl ka on tuuk kiikna khyh ham.

Zaaksakna

1. Paletwah ramla ka awm MATU thlaang phyng cakkii peng lawng thumham a ngaih ah tah MCYF Hynpui (Office) ah cuut la awm ham.
2. Paletwah ram Alimoi tlaang ben kah te tah Dom(DCYF) ah thum ham.

16. Awl yynna

Maturam dek zek khuiah thlaang phyng pek bouna awm. Buu za hawh,awl kaa zakming u boih nawh dawngah lawlhmaiathli bronawh la awm. Te dawngah pokna, huhna, mingna thik at thai nawh. Tede MCYF lawng kam thlahna tah Maturam pum dan tih bibi ham la awlpui ngaai la kamthlahna ni tihe thlaangboih lawng zakming ham theen.

17.Lungling

Khawhal tyah tui lawng kak tih rai lawg khaw aty ah rem, rawdai lawng khaw aty ah hum tih dyk, thlaanghing khaw khum thai bal, tede mawtna a lawng a mi tah tui baap angla hing zozah, n'khaw ham hai thoi la awm tihe Matu cakawthli kah lungbui ah hilh nawh lungla ka sym tih ka ling.

18. Lumlaa ben kah ming ham koi.

Maturam ah laa ka phawh thai on laa ka sa thai thlaang cadawng hula bro nawh awm hang van pon. He tih lah laa ka phawh thaithli on laa ka sa thaithli he a mah thlaang khat thahyrna on a **CD, VCD cassette khei** ka saithli he Matu cathli lawng thangpawm ham awm. Te byng ouh la Degree(lummyk) ka dongthli Muityng kawngbu (Video) ka kawngthli lungdinglaa (Love song), Ramlaa on Patheen koh na laa buu on Pathen awl ciim Holy Baibul ka van kawngthli on ka saithli he thang pawm ham tyng. Hethli lawng Maturam a pawmsang tih a hula sak. Ram on thlaangphyng lawng kan hilh u nawh.

Sailai Thalamsawngpai Mob : 91-9971659475

Email : thalamtlang.por@gmail.com



KUIHON THAWTNAKAWNGHUATAWI

1. Mopi tlang

Kuihon ca he thiling khawpui teng (Can nam) ka lawng sin tla tih vathawt u. Tehyn kalawng Chin mawltlang la lui u tih mopi tlang hui, hawngtum a van pha u. Patyr Kuikui he mopi tlang hui van pha tila a na thui u. Tety vengah Kuihon ming he tyngthlan tih tawmpaw thlang tila ni ana thui u. Kawl thlangphyn awl tawngpawtaa ming ke a thui u thai nawh dawng tawmpaw thlang tila ana thui u. Mizo, zomi, ming synna tah hetih la awm. Zo tihe tah, tlang thlaang thuingaihna la awm. Tetih angla Myn lawng kham la luihang tihe (Cho) tila ana thui. Tawmpaw, Cho, Zo, awlphawh lawng he tlangthlang thuingaihna ni. Tetih la he kah (Cho) ming lawng he khaw seh tlangthlaang thuingaihna la awm. Tawmpaw khasut thlangvang hy tah mopi or khawpawl hy lawng lungting tlang van kan u tih lunghang im hyn ah cu u. Tehyn ka lawng patong ngala khawhyn ah pawng tih akan la awm u phat. Khasut thlangvang tah botsih la pong u tih khaw a sak u. Mopi tlang hui ah a awm veng, khawmap rammapp thaihu a tawng u tah awk, seelphai, sel lengthli, thawleng u tih lungtou mui la cong, te kah lungtou muithliphli tihin hil to khaw awm hyn. Te ang thaihu a taawng u veng tethli lawng diklai ty khum tih pawcii pon myma ti u.

2. Vakawk awllung

Tawmpaw hyn mopi tlanghui lawng botsih la pong u tih lawngpyng a ceh li veng vakawk on hum u the. Va soprep boih lawng tuiva sawkca tui a awk u. Vakawk nang kah na tui awk he ka hu vai nawh tih, tu tui nym na awk na cak tila awl a dot. Thingkhui kah ka bym, thingpi (Ciingtui) ka awk tih haari, khawngdyng thaih ni ka caak ka awk ati na. He kah awllung pahih (2) he vakawk tengah tawmpaw hy lawng a dang cyk tih, (Alphabet) awllung la awm.

3. Botsih

Botsih im hyn a awm veng tawmpaw hy lawng thlou Ai, laa lung a syn.

1. Apa tuikawng -Khawri, khawhyn, kangmah thuingaihna la awm.
2. Anu phungtyng-Hutaa ben thuingaihna.
3. Apa boitai- Pia, huitai, thintlou kawna thuingaihna.
4. Athaw oiza, Ahai zawne- Awmngaih kawho, phyn on khawhyn thangpawmna thlou ai laa lung la awm. Thlou ai laa lung he tawmpaw thlangthli kah thlou ai laa sakna (Sawl fa) lumhacyk awllung la awm. Kuihon, Awmthang, Ngala, Kainan, Kuithou, Nawmca, Kalim, Thlangpang, Ngatu, Tuihingca hy boih lawng hekah thlou ai laa lung khatla boih n'sak u tih hawna la awm. Thlou ai laa lung ka vai u rip mami boih hy he khatla n'thawt haih u myma tila huhna on pokna ka tyng sak.

4. Thlangpang

Mopi tlang hui ka lawng botsih, Aidak van kaan u cong vasin tla thuk tih thlangpang (or) khawlawng duup hynah cu tih khaw a sak u. Patyr Kuikui he thlangpang, van pha tlaih nawh tih a Ca Kuinong lawng ni a van pha pon. Thlangpang he a cykah (Pangvan) khaw amingna tih Paham Vawmtumawng lawng, thlangpang mingla a thaw. Ngala, Vuilawng, Phaneng hy, awmna hyn ke khawpawng, khawtuu la awm tih Thlangpang ka lawng meh zyp pawngpaana hyn la a pawn u tila Salai Zawmng mindat

ahih lawng athui. Thlangpang ah awmtun u veng, Thlangpang nam pakhat (1) tah cehthee phaiphu ah palit tih a lu sawah bongha a cak. Bongha a hoih cong, bongha ngaw alu sawah ri u tih lurii tila mingkhep a sak. Thlang pakhat van bal lawng hin rok, valang pahaa (10) a zai popa tih valang mingkhep a sak bal. Tetih angla valang + lurii tila tihin hiil to ana thui u phat. Thlangpang khaw ka lawng thlangping zahawh ngaai tah lemrou tuiva khatben la kaa u tih, Canre im hynla pongtih cuu u.

5. Canre im hyn

Thlangpang ka lawng thlangping zahawh ngaai tah Canre im hyn la patong pong utih cuu u. Khaw kumhaa (10) awm u cong, khasut tah ceem ana rih u dawng hu lah mel u kop tih langkawh kengvan hyn ah cuu tih awm u. Tethli hy tah, Kalim, Zoophawng, Kypna, Suntui, Liksawl hy la awm. Langkawh kengvan im hyn ah a awm veng Suntui lawng, thinghuiah tuibap pakhat a huh tih vaikawng on dym a vui. Hin at vai tah zuu a awk u li veng, Suntui, tui huh awk ham, thingsawi ka lawng thangbe va sawng thuk tih, tlik tlik tila ring. Te awl Suntui lawng a zaak veng, ka tui huh thangbe va lawng a awk tila a thui. Tuithan sawk thla tih, Vawm kaithli a tlung dawng camo hutaathli lawng tuithan ham a rih u. Te vengah kethli lawng Suntui kah tui thuh te a tlap u tih im kaak ben kah thinghuiah vaikawng on a vui dym tuibap te a huh u. Te vengah tethli lawng Suntui te zun ek on pit pawm tola abawh atam u cong khawkhui kalawng a hek u tih Suntui khaw la pong. Suntui tihe tah tui thuh tina ni. Canre im hyn kalawng khasut bal tah Boisiip, Amsawl, Pantui, Cathleh, Belkhong, Palaraw, Thenrawng la pong tih khaw a sak u. Tethli hy tah (Nawn ca) a mingna u. Khasut thlaangvang Hepna, Pacang on atlo hy lawng pawng myh la Canree im hyn ah awm u. Tecong khasut tah Thuito im hyn la pong u tih, Canree + Thuito tila vang panhih (2) la pek u. Kuinong ca Kuihon he canree im hyn van pha tila ana thui u.

6. Thang On poi tlok

Canree im hyn ah tasawngca Paham Thang On tah apat benah (Pana) haivong poi tlok ham kam thlah tih valii ah a zu vik a dyk pe. Te vengah thlou laa a phok tah, cangkym, vaikym, cang, aw kym huk bol tak tak, mangsangthli lawng n'awk na seh. Mopi tlang hui lawng ki khok awl na zaak ca ngai ai. Apat ah Pana haivong poi a cak tih thuito im hyn kah ka awmthli on paca thintlou thenrawng nam poi panla a lawh. Te vengah thenrawng nam lawng tasawng ca ka bentang kut tila a thui. Pabe na ah ponai nam kah seel pumkhat (1) on a tawm thyl tih seelnga (5) poi a na cak bal. Paham Thang On lawng poi a na tlok cyk.

7. Lawngkawl talawng

Thuito im hyn lawng patong pong u tih lawngkawl taa lawng, Hyndilh im hyn la pong u. Tehyn ah Kuihon ca Hepna on Pacang ca lawng saa rawng a vai hih. Rawngcyk ah hepna ca lawng saza a kah de sathang la a awm nawh dawng tamlung soh myh la thingbuk on dym a vui. Pacang calawng rawngcykah Awkngal a kah tih khuih Pacangca tila tamlung a soh. Hepna calawng rawngbe ah sazuk kinu a kah tih khuih Kuihonca tila tamlung asoh van. Te awl pacangca lawng a zak veng m'Patyr ming kuihonca ka ti van mai makawi tila athui. He kah tamlung sohna sawah thuicaih ham ka ngaih tah kuihonca on pacang ca lawng sarawng a vai hih tina awlphawh thuina he song nawh. Hepna on Pacang ca lawng saa rawng a vai

hih n'ti makawi. Herawi he boinau hih tih kuihon he a na pa ni. Kuihon, Pacang, tila tamlung soh, awl phawhna awm cong ka lawng tah tawmpaw thlang ti tlaih myh la kuihon, Pacang la ni a na thui u pon. Lawngkawll talawng Hyndilh im hyn ka lawng, tawngtih Kuihon on Pacang ming he syn cyk la awm. Lawngkawll im hyn ah kum (150) dau tih awm u myma tila Vanlenthang valangpi, kuihon kawngghu a tawi thutna dawng a tyng sak.

8. Thangnan Haaibang kawng

Thangnan lawng Haaibang akhyh. Te haaibanglawng angna a khyh tih phung phung ang tih ming ka thang langlo thaihu pakhat la awm. Hin at veng atah, Thangnan lawng Pacang zu a thawlh pui tih a pum sawah a kawp veng, Pacang capa lawng a huh. A capa lawng an pa tengah apa anu sawah phung phung ang tih long long tlai ati na. Tevengah Pacang lawng ka zu sawah ka kawp he a u ma nawh Thangnan ni haai ka khyh tila aming thai. Te hin tah (khawty) hin la awm tih zusuk lam on poi a bur u. Lai hukung Thangnan he laa ka thom thlaang la awm. Tede thlangping zusuk lamna ah thum ham la zak. Laa thom ti u tih pacang lawng ng'kah ai ti a rih pui dawng, a lu sawah (thepcang) dong rui la a lam sak u. Thangnan lawng o,o,o on laa a tawng pe de laa thou nawh ti u. Pabe ah Thangon lawng aw,aw,aw, on laa a tawng tih laa thou pon,thou pon ti u.

9. Thangnan kah kawng

Khawty poi ah Thangnan a law li veng pacang lawng kah ham Thanglahi a cem tuh tih a saw tlangla a lui sak. Thangnan a law li veng singling la a kah thuk tih alu saw kah a dong thepcang keng ah a la a tlak pe tih khawpui ah a de. U on nym n'kah van kai dot u lah tila Thangnan lawng ati na. Apa on ni ka kah pon, a nuca te haal hawn seh tila Thanglahi lawng awl a vol pe. Pala sy dapna ham Thangnan lawng haaibang te seel on awkla tasawng nam Thangon teng ah a zoih pon. Sy a dapna ham seel on awk abawh tih a tui a awk de sy a laawt pe nawh dawng Thangnan tah dyk. Ponai nam Zawngrop im hai athawh vengah pacang kah sy tah ung tih dap pon.

10. Hepna on Pacang lawng pekna

Kuihon carawi Hepna on Pacang boi nau he lawngkawll im hyn ah Pa dung, dunghih to tawl vel haih tih zusuk poicak on awmthen a bon u. Tecong lawng tah pacang ca hy lawng minthung kawng tlang la lui u hang tih Cangtaak im hyn la sintla thuk. Hepna ca hy tah, Rai im, im hyn la pawng u phai. Te tih angla lawng ka ming nawh Hepna on Pacang ca ceh lawng tlo tlo panhih (2) a na pek u pon.

11. Delhi khawpui ahiil dawng u

India ram tung kapha, kawlrang tung, chin kangmah, Palewah ram, khawmi Refugee raica hy lawng,29/12/2009 khawhin ah Salai Manglai on Salai Zaatte lawng a khawl cuui tih delhi khawpui a hiil a dawng pui. Matu on Zoutung thlang paha lawng a bawngzawng u van. Ming ka thang, on langlo thaihu, zaan kah lung im kut ngawthli ahiil dawng u tih, muithlip a kawng u. Mincang khawnok (8) ty lawng thlemben khawnok (7) to a hiil dawng cong im kop a pha u tila ming on zaak la awm.

“MATUAWL” ON “KUIHONAWL”

1. Awl dotna

The Matu Herald Vol. No-11 Issue XIV dawngah Matu awl on Kuihon awl tila suttung tai la awm. Matu awllung he Kuihon awllung la a pawm mang khak tihe ni. Kuihon awl tihe awm nawh tih, Dom awl heni ka awm de ta. Ng'tu a thui ngaihna tih, awl dotna aw, te nawh atah thuicaihna awl aw, ka zakming ciim thai nawh dawng, by konglong Aipoeh nang reenna on ka awl dot van vol ngai de? Ngaiyp ruila.

2. Ming on Awl kaa

Suva lawng amah awl kaa a khyh boih angla ming khaw a khyh u boih. Tetih van angla matu thlangphyn rook lawng nuham paham ming, phyn ming, khawhyn mingthli ana sak u. Matu tah ram pakhat la awm tih, kuihon tihe tah Pa pakhat ming la ni a awm mai. Matu awl he awm tangte pon tih, kuihon khaw matu khui kah thlaang khat van tila kai lawngtah ka zak ming de. Awllung on awl oi (oe on ue) (O on Y) he ni ng'ram on ng'thlangphyn lawng raina ng'tawng u cawi ni ka tide ta.

3. Matu ca n'rongna

Matu lawng mah awl ka awlthang on atlo tlo cabu n'sai thai van pon he byh veng awmngaih ham awm pon de, tede imkhui kaw ah a ka song nawh on tula a thum nawh awl he tah n'thut u nawh kawi theen sui de,

4. Maturam pumham awllung

Matupi ati he khawpui ming la awm tih, thlaangkhat, thlangphyn khat, la khaw pok ham awm nawh. Maturam pum khui ah aka thuum tah, Matu, Dai, Ta aw, Maram on Zoutung tila awl ka tlo tlo on thik at la n'cuut u haih, he kah cuut haih thlaang boih lawng awllung thik at la ng'hawna thai ham he ni awlpui cawi ni ka ti de ta, Maram, Zoutung, Ta aw ben lawng tah awllung a na khyh pon tih tu khaw thui ngo tlaih nawh. Tengvai ah ka awm koi nauthli kah awllung byh on Paham Ngai Tim lawng, Hakha, Mizo, Maram, saza la ana khyh tih awllung a na sai he ngawldolh thil tih thoih nawh ham theen de ta.

5. A zung mitsak roro ham awm.

Matu awllung on kuihon awl, suttung taina a bot ben cathan dawng, Dr Awng Thang mi yangon matu cathli hui at lawng matu awllung sop tare na ham humtunna khyh ham kamthlah u tila a ho. Te kamthlahna tah pabe kamthlahna pon ni. Thaihu theen sai ham kamthlah hona he awlthang then pakhat la awm tih awmngaih ham caal cal la awm. Tede thaihu theen thlaang khat, thlanghih,kah ngaihna thli he a zung mitsak roro ham awm pon tina awlphawh thana he (Anthui an) dawng kah lunghanghym sak karh angla awm tih,awl thler,zakkell la awm. Thingkung rongsak ham tui syyp ham koi te a zung tola phuk tih mitsak ham tihe taldawng sawah kut tlong tih pok ango ai. Maturam on awllung thintlawnha ham awm, thlangboih lawng matu ca tee thai ham la awm, ka tithli lawng he, pumpit paicoon sawah matu Baibul cabu tee ouh la thlangphyn tlo cabu awl on ni a tee u lat. Tetih angla yangon matu ca hui at, kamthlahna lawng he kutpui panhih la ka phee matu awllung la congna nawh ham awllung sawah yp awm la awm ham ango ai.

6. Roprouna lansak

Tuitun li dawngah ka bol u “NAJIT” thlipui lawng thlanghing he raina a peek tih a rih awm tang kiik. Thlangcuihthli lawng a ming ahuh op soh tih phethaina on aphee dengah “NAJIT” khawthli lawng ha thai. Tihin hang maturam ah “NAJIT” khawthlipui thli li la ka awm he phe tih dym thaina ham tah buhcak coon sawah mikhai humtun sopna a ngo. Coon saw humtunna on thui ngawngna byng nawh atah roprouna a tlo awm nawh. Dom lawng Aphee, Ngalaaw lawng Pala, Cing lawng Apaak, Dai lawng Samsen m'pawm u rip tih kai ngaai tina thinkaw lungbui kawpok khyhna lawng maturam ham thaihu theen congthai manawh. Kah on tlokna samsen hainawthli te lansak pha ham ng'hengli lawngpyng tintan ah tlongsut myhla roprouna coon saw m'pha sak tih ng'tlong dengah ni matu cakaw kah mengtengna lansak m'pha thai ai tila atawi ka tyng sak.

Bolraikung

Thalam. Salai Sawngpai, Ph-91-9971659475

Email: thalamtlang.por@gmail.com



KUMTHAIDOUNA

Diklai saw kah Pathen kutsai thaihu boih he athai on aym pahih la a pek bou tih a bol a rai. A thai lawng awm lumha tih a rym thaihu la cong hang. lumha ty awm tih hu khyng khawhin ty a awm angla, khaw thaih khawziin ty lawng awm. Kum rymty a bot cong a vyn mincang tah khawhin thai, thlah thai, kumthai hin tila tok kopna awm. Tetih angla 2009 kum rym lawng khum tih, 2010 kum thai lawng vapai pon. Tedawngah awmngaih cil thui zying la bentang kut boih kan tuk. Pelnam thlaangping lawng kumthai apha u tih awmngaihna *Awk, Seel* bawh on khawhin thai a dou tih awmthen abon u. Cadawng hulathli lawng apat loutyl kah khawngtym pai on duppui dupdawn kah samto, tuizul, hawnlihkung on kumthai a thok cau u tih a dou u. Thingpai, raipai, lawng khaw, paailum on kumthai a dou tih matu ram, mawl sawm tlangawmthli dan ngaih awmthen sak. Nunu patawngthli lawng apat loutyl kah, *baal, haathli* on thlemhah pumna ah aphou pui u. Thlemhah a bot lamah laa sakna, palom thuina, laamnathli on nuihcal awmthen u tih khat on khat kut dou pe u the. Tecong zimthym Aikhawk lam apha veng atah imlou la khom u.

Kumthai sa lawng tah Camo huta, cadawng hula on nuham pahamthli lawng, khawvawk ramcak cil ni ana thui u pon. Khasut lawng khaw ahip u tih haikhaw rok bah on pawhyn a caal cong khawthun khawvanganh imla kho u tih mang a ngai u. Cawn niruk hin tah, an flap khawhin la a hoop u tih, seuh, lem, pyng vah on camaw hutathli lawng tuihawi ra asak u. Vahthawk hungkang tyah im, khai, sak ham hutathli lawng diizyh diihang a cawn u. Hutathli lawng huhang on loutyl ah thing atawp u tih, thingtawp awl lawng khong khong pau tih ring. *Cing, Dom* noitlang kah lungtik haikhuthli lawng a saw vaanla dong dong kathou ka zaalthli dan veng awm damla flou. 2010 kum rym khum tih 2011 kumthai apaai thlan to rulthe, thlipui, zilhthe, lawng matu ram saw ah vatla bol seh.

THLANGHING ZALPAWNA

Thlanghing he suvaa, pawngsa angla khawcung tlangawmah buu tuk on mah byng phingter u tih khaw ka sathai nawh thlanghing la ng'awm. Thlangping on vang cuut haih tih, im lou khyh ton khuiah zuva, caanauthli on thlem mincang buh vel haih tih nuihcal ruila awmthen ka bon thlanghing la awm. Nu cazen bungkhui thangpek ka lawng zalpaw thlaangla awm pahoi. Khawri kangmah khuiah pel thawng kah tih zuusuk lamna on awmthen tih zalpaw khaw cuui uk huiah lungtou thingngaw bawh on khawsak awmthen ka bon thlanghing la awm. Tede thlangping cuihthom thaithli lawng caryp hainaw ypna on ka khang mai nawh thlangphyn ke cem athawh thyl tih tlok, kah on bymla awm. Tetih la diklai saw ah *voi (2)* ralpui haipak thou tih saal kut bym uk hui khui ah pinzen la awm u.

CHIN ZALPAWNA

Chin thlangphyn he Taluk ram tung Tibet tlangzawn lawng sin tla thuk tih chin mawl thlang kangmah a pha tola zalpaw ukna huiah awmthen ka bon thlangphyn la ng'awm. Nam tlo kut bym ukna hui ah ka awm vai nawh thlop at phyn la ng'awm u. Tede *1885 kum British* lawng kawh van a bym cong *1887 kum* Chin tlang kangmah avan pha. Tetih la namtlo uk hui ah awm ana ngaih u nawh dawng thlangbawh *British* ceemtah ral bawi

paham Cawnbik on aralkapthli lawng ana tlok u tih khat ben khat bang ah dyk on bongha a cak u.

1889 kum thlangbawh ceem hy chin ram phung kaak ben Mindat avanpha tih ana tlok u the, Tevengah kawh van kah ka awm *British* ralkapthli hu ben lawng cemping vathou khungdeng tih pilnamthli to ngawn on athe kha na u. *British* cem lawng namtlo phyntlo kangmah ram tungthli ke a zoi kook cala bym thai la awm. Tede chin phyn kangmah hetah a tloina tih khaw kum (10) a dau cong ani bym thai la awm hyn. 1896 kum *British* lawng chin kangmah ka bym boih pon tila a ho cong pala hainawthli tola a tuk pe tih the khana rawnu khaw la tlan.

1927 kum zophawng, bawng, kalim, thlatui on ngala (or) butu khawpui kah im, khai boih hai on a dawh. *1933 kum* Chin National Union huiat pai u tih CNU he syn la awm, CNU huiat lawng *Yangon British* tengah chin phyn kangmah zalpaw *Independent* dang ham a na bih u. Tetih la bihna dawng *1939 kum* CNU huiat tah a tuk tih Airawl khui a tung ep. *Zalpaw Independent* huh dangham bihna a lawng im tah he tih angla awm. Chin he thlop at phyn la a awm angla *British* cem ana tlok tih mawtna a lawng im flo syn on a thlop cala khawlcui uk la awm. Te tih angla chin phyn kangmah he a thlop cala zalpaw *Independent* dangham CNU hui at kah bihna he thlangboih lawng ming tangte la awm pon.

KAWLRAMTUNG ZALPAWNA

1945 kum *British* lawng ralpui haipak boih adymsak cong, kut bym tangte la ka awm kangmah, ramtungthli, zalpaw *independent* pek ham, *England*, ram saithaina *politic party* cut tykna on meet sangna awm. Lebar party, Attaly lawng minister adang tih, 1946 December 20th khawhin veng England ramtung la laaw ham Aung San azaksak. Attaly awlkyhna angla cet tih va mel kop cong zalpawna huh dangham koi Chin, Kachin, Shan hy humtun utih zalpawna lawh haih ham a kaw vai u. *1947 February 12th* a pabe la Bama, Chin, Kachin, Shan kutzyng laipai hy Shanram tung (*pinlung*) ah humtun u kop tih kangmah ramcuut khat la pai haih ham awl a tlok tih acaksak u. Te khawhin *February 12th* hin atah ram cut pui, Bama ramtung tila ming syn on ana cak sak. Awlpui tah a coilh democracy alawngim songla ceh tih ram cut haihham mengteng thil kok la awm. Tetih la awl khyhna pha thlan veng thlangtheethli kah kutdawng paham Aung San tah dyk. Tevengah sahubatyet lawng U nuh he a mah hui kah vice-president la a tyk. Aung San kutzyng laipai la ka awm U nuh lawng zalpawna lawh ham 1948 October 17 khaw hin ah England ram tung la cet. 1948 January 4 khawhin tah ram cuutpui kawlrang tung zalpaw independent khawhin la ho ham awl a tlok tih president ham Aung shwe a tyk. *1948 January 4th* khawhin mincang ben khaw nok 04:20pm, ty a tah zalpawna pek tih yangon khawpui ah dym ham *British* tui sangphaw valaw. Tui sawngphaw saw ka lawng lumpawh bouthli a kah tih a pawk sak u. Tom, mawngleng, pengsara, mokou on *British* bawh im kah darkhingthli a tum a khok u. Hai pawk bawm on hai vang cungthli a saw vanben la a kah hang tih yangon khawpui boih hai ang. Tecong *British* ralbawi pakhat lawng nokna (*alaan*) te khakhui la a dok thuk cong kawlrang tung nokna (*alaan*) te a saw van la a pawm sang hang. Zalpawna ham lu ka voi tih aka dykthli hinzahna minute (2) awl myh la thlangping lawng pai u.

Zalpawna voi (62) cupna *2010 January 4th* khawhin he kawh baran, NLD party on ramtung tlo ka pha, raicathli hy lawng khaw seh tihin to bur la awm. Te khawhin burna lawng mami loihna

on zaal pawna n'pek tang tang kai aw. Zaak dok tih, laai on nekzet cong 1962 kum ah tah khaw soih bawi Nee Win lawng a coih Democracy ram saithaina party cut, mawtna a lawng im boih a paw cii sak tih byn la awm. Mawtna a lawng im song te thlangkhat ngaihna ka song nawh, a lawng im uk hui ah tihin to taamna la n'van u. Ram cutpui (pinlung) catui kut hahna February 12th khawhin te a hawnghi angla a cong sak. Te tih angla January 4th zaal pawna khawhin lawng kut khaw nym ka cawn tih, tuicin kawngvaa, Aidak tlang vol, haa bym mawl la nym a khum kai. Chin zaal pawna ham kut zyng laipai hykah (pinlung) ah catui hah on kut a kii tih a silh ciim pon dawng kut al thlang la ng'awm u tlaih nawh. Te kah ca tui hah awl kamna tah kawl thlang phyn hy lawng a pawcii sak tih, kut al laikung thlaang la awm u pahoi pon. Te dawng kawl ram tung boih hawp on democracy huh dang ham, thlangping pangna on chin phyn lawng hingna peseng to lu voih ham la awm nawh. Cehlawng lawngpui tah kut ka al thlangthli lawng ni a tuk ham awm. Mami chinphyn tah (pinlung) ah awltlok na dawng kut kii la n'awm pon tih n'pong pon dawng democracy kawng dawng luu voih ham la awm tlaih nawh. Te dawng mami tah Chin, matu ram ham a ngo ngaihna dawngah ni thii ngan, hingna peseng on lu voih ham la a awm tihe huhna on pokna ka tyng sak la awm.

THLANGMIA CAWIPON

President Than Shwe lawng 2010, January 4th Independent khawhin veng ram sai thaina politic party cut tykna he thoih nawng tlaih ouh la met sang zozah ham awm pon ai tila a ho. Tecong Janaury 8th hin lawng a tawng tih Mandalay khawpui ah thlangmi a cawi li pon tila 13 Janaury khawhin ah RFA awlthang dawng aho.

MATUKRICA PAWL NENGNA RONGTHAI

Matu Christian Fellowship khui kah rongthaitli lawng kumhih asupna apaina khawhin tah 6/01/2010 hin thlemben MCF baw im ah aty hawna la awm. Awlpui la suttung tai la ka awm tah, "Na rongthym li vengah nang a ka Saikung te ming lah" Ekkl 12:1 atihe ceh pui tih awlthangthen cun cahkung Cd. Rocung lawng a ty hawna on awmngaih kaw ho cala aty tah a bur u thai tila zaak on ming la awm.

MATU CHRISTIAN FELLOWSHIP

Mah khaw ram ukna a then nawh dawng n'ram on n'thlangphynthli ceh taak tih India ram tung Delhi khawpui ah ka awm Matu Krica Pawlnengna thlangbolthli lawng avoi (8) na hum tunpui (conference) tah 10/01/2010 hin ah a ty hawna thai la awm. Tecong 2009 kum khui mawtkung ahamcathli kah bibi law lawhna kawng hu tokna a awm cong awmngaih kawho cala 2009 kum khui kah mawtkung a hamca Houtu Pa Vangdyng lawng awmngaih ciil a thuina a khyh. Houtu Pa Vangdyng lawng awmngaih cil thuina a khyh cong tukum 2009 khui kah mawtkung a hamca bibina on mawtkung rawihui at kah bibi nathli boih tah tihin 10/01/2010 khawnok lung 2:30 pm vengah bot la awm pon tila a ho cong RO la ka awm Pastorthli lawng a ty tah pahoi a lawh tih 2010 khui ham mawtkung ahamcathli tykna aty tah pahoi khyh thai la awm tila zaak on ming la awm.

LANGLOAWLTHANG

Vaitaw khawcawn

2010 kum Janaury 23, khawhin Delhi khawpui ah langlo thaihu awlthang ka awm tah, kum hih vaitaw talnou raawi kah lungthu sawah a khaw cawn. Ka khyhkung huta thlaang pathum lawng khawkhui ah a mawt tih, ka byh on ka huthli lawng tangka pheksa adou dan u. Pum at tah lungthu sawngah a khaw vyn cawn tih

bantang ben la bat thuk. Pe khat thlai san tih khawvym a botna ah khawmee cawn.

Vaitaw pum at bal tah a lungthu saw ah khaw vyn cawn van bal tih banvoih benla bat thuk. Peekhat thlai san tih, a khawvyn a botna ah a khaw mee 5 la phe tih cawn.

ELECTRICTUNGPAWCI

Kawram tung kazaa kang mah, lawpihtah hai vaangtung tah pawci tih, hai vang thai nawh tila baran lawng 2010 Janaury 23 khawhin ah a ho. Tetih la a ho cong a thumhin, 2010 January 26 khawhin ah lawpihtah hai on lumpawk hainaw saina la kawl baran lawng a haw na dawngah haivang tung he KNPP lawng bawm on ka phe tih ka pawci sak u tila athui.

AIRAWLKHUI LAWNG SUHKYILOIHHAMATHANA

Daw Aung San Suh Kyi airawl khui a tungepna kum (6) cupna, 2009, May, 4th veng, American nam ca Mr. John William, Yettow tah Daw Suh im khui ah a hyp la kun. Te dawng kum khat thlaruk a thoih pe tih airawl khui a tungep kop. 2010 kum November thla khui ah ka thlah pon ai tila kawl baran lawng a ho. Tede nuham Suh Kyi lawng loih ham a thana. Section, poumah, (-) on ka tun tih Section, poumah (-) on ka loih sak tila tyngsak ham a ngo. Te tih la tyng sak thaina a awm nawh atah Daw Suh lawng loih ham a thana. Tedawng kawl awlcek bawithli ngihangon pyn caak li la awm u tila, 28 January, RFA awlthang dawng athui.

NLD PARTY LAWNG MAWTNAA LAWNGIMA SAI

Kum 2003 NLD party kawram tung hynpui tah Yangon, khawpui ah khyh la awm. Sawben kah uk teemna a lawng im ang la ramtung kangmah on khawpui khawca rok ah mawt kungthli tyk thai la awm. Tede 2003 may 30th khawhin (dipayin) ah khawpaw awlpungna awmcong ka lawng tah khawpui rok kah NLD Office boih kawl baran lawng akhah tih a dym sak.

Kum 2010 January thla, khawhin (4) khui NLD EC rawihui (committee) hy hum tunna a khyh u tih mawtna a lawng im tah sai kop la awm. Baran lawng a sai (104) mawtna a lawng im saina on NLD party kah mawtna a lawng im saina he vai u the nawh na on tingtawngnathli awm tila 2010 Jannaury 26th khawhin RFA awlthang dawng U Khing Mawng Ci lawng a thui

Kum 2010 party cut tykna (Election) saiham khawhin, thla aty tanghe ciimphan la khehna awmthlan hyn. Teveng ty kah (Election) ah NLD party he thum on thum nawh ham awl tlokna awm thlan. Party cut tykna (Election) sai thlan ah, Daw Aung San suh kyie thlah ham a ngo tila, 29th, January, khawhin ah VOA awlthang dawng Dr, Win Naing lawng a thui.

Bolraikung

Thalam. Salai Sawngpai, Ph-91-9971659475

Email: thalamtlang.por@gmail.com